

Mercoledì, 23 Ottobre 2024

En domenia ai 3 de november, a Moena, la Majon di Fascegn ge dedichea l apuntamento anuèl "Do l vièl del saer" a Catina Pezzé Batesta e Bepi Felicetti Zompin, doi persones simbol del temp de la Gran Vera te Fascia.

"Do l vièl del saer" : n nef apuntamento co la biblioteca ladina de Fascia

[Ladino] Ence chest an la biblioteca de la Majon di Fascegn porta dant l apuntamento co la scomenzadiva "Do l vièl del saer", che la perveit de ge dedichèr n spettacol de teater a n fascian o a na fascèna che à fat la storia de Fascia. Per chesta edizion l é stat chierì for doi persones.

La raprezentazion de teater "Do l vièl del saer – Catina Pezzé Batesta e Bepi Felicetti Zompin vel te dir vèlch" la vegnarà portèda dant alalèrgia te la Cort del Batesta (dedò Piazz de Ramon), en domenia ai 3 de november te doi appuntamenti, da la 14.00 e da les 16.00.

Alberta Rossi, responsabola de la Biblioteca spezialistica del Istitut e del projet, la spiega percheche l é stat cernù chesta doi persones: "Chest an aon zelebrà l diejem cedeàn de la mostra "La Gran Vera-La Grande Guerra: Galizia, Dolomites" che la é ja Moena e dachelanvia l Museo Ladin l à metù a jir na lingia de scomenzadives tematches. Aon dezidù donca de ge dedichèr a chest argument ence la ativitèdes sul teritorie de la biblioteca e per chest event aon chierì fora Catina Pezzé Batesta e Bepi Felicetti Zompin, duc doi joenec che stajea a Moena e a Someda ti egn de la Gran Vera. La stories che contaron e che portaron dant te chesta ocajon les merita delicateza e sensiboltà, tant percheche contaron la vita de doi joegn tel contest de la Pruma Vera Mondietà n event che à straout e mudà la vita de l'Umanità tant percheche, do passa cent egn, aon amò vere sun usc de cèsa".

Autora e regista del test l é Ilaria Chiocchetti da Moena: "La raprezentazion la vegnarà spilenèda dedant la cèsa de naa de Catina, olache n'outa l era la pecaria de familia. Aló la vita de Catina, de Bepi e de sia families les se scontrarà e les se enterzarà co la realtà de la Gran Vera te Fascia. Per scriver l test é durà ence la intervista video a Bepi Zompin che l é te Archivie de la biblioteca del Istitut Cultural Ladin e l liber "Piccolo diario di Caterina. 1912-1918: dalla pace alla grande guerra", diarie scrit da ela enstessa endèna la vera e publicà del 1995 dal Grop Ladin da Moena. Sessaben, desche per i etres projec, é tout pèrt dessema al personèl del Istitut a la intervistes fates ai parents e ence da chestes é podù tor fora materièl prezious".

"Aon chierì fora la data dai 3 de november" disc amò Alberta Rossi ajache ai 3 de november del 1918, apontin acà centesie egn, l é stat sotscriit l armistizie che à metù fin a la Gran Vera. Con chesta raprezentazion volon dèr ence nos n message atuèl e fon sul valor de la vita e de la pèsc e su la emportanza de la colaborazion. L é con chest spirit che ge aon lurà do al projet e speron de esser bogn de ge passèr chest message al publich. Ve speton te la "Cort del Batesta" (dedò Piazz de Ramon) a Moena".

No vegn domanà la prenotazion.

<https://youtube.com/shorts/Gp7ggB9JOMk>